



***Komunikadu Imprensa***  
***01 Outubru 2012***

**Tribunál Distritál Dili Kontinua hala'ó julgamentu ba kazu violénsia doméstika**

Iha 24 Setembru 2012 Tribunál Distritál Dili julga kazu violénsia doméstika ba arguidu ho inisiál JSS ho númeru prosesu 191/C.Ord/2012/TDD.

Ministériu Públiku akuza arguidu ho artigu 145 Kódigu Penál konjuga ho artigu 35 Lei Kontra Violénsia Doméstika. Arguidu konfesa totál faktus ba tribunál. Ministériu Públiku husu atu la prezisa rona testamuña tanbá iha faktus kofirmadu husi arguidu.

Dr. Antonino Goncalves prezide julgamentu, Dr. Jose Landin reprezenta Ministériu Públiku, arguidu hetan defeza husi Dr. Manuel Exposto husi Defensória Públiku.

*JSMP louva autór judisiariu nia komitmentu hodi julga kazu violénsia doméstika, maibé JSMP kontinua enkoraja autór judisiariu konfirma verdade bázeia ba enkuadramentu juridika Timor Leste nian nune'e bele produz justisa ba comunidade ne'ebé buka justisa.* ”dehan Luis Oliveira Sampaio, Diretór ezekutivu JSMP.

Iha akuzasaun Ministériu Públiku haktuir katak iha 2010 arguidu no lezada moris hamutuk hanesan fen-laen iha Camea Becora. Hafoin ida ne'e, lezada grávida to'o fulan 8 komesa sai husi uma laiha koñesimentu ba arguidu. Iha 27 Outubru 2011 lezada dehan ba finadu iha Atabae, arguidu to'o Ossu lezada iha ne'ebá hela.

Tuir mai iha lora 4 Novembru 2011 lezada sai husi Ossu mai Dili sein arguidu nia koñesimentu, derepente telefone katak agora nia partus ona iha Dili. Iha lora 5 Novembru 2011 arguidu mai uma, lezada la hela iha uma. Ne'e mos iha 9 Novembru 2011 lezada mosu ba uma sein labarik, maibé dehan nia sei lori mai iha aban. Tanbá ne'e, ho hirus arguidu basa dala ida iha lezada nia hasan karuk. Depois akontesimentu ne'e laiha komunikasaun entre sira.

Iha alegasaun Ministériu Públiku husu tribunál atu aplika pena suspensaun tanbá arguidu konfesa ona faktu sira relasiona ho kazu ne'e. Defeza husu tribunál atu aplika pena de administrasaun ho valór mínimu tanbá ne'e suficiente atu muda arguidu nia komportamentu.

Julgamentu adia ba 11 Outubru 2012.

Atu hetan informasaun kle'an favor kontaktu direktamente

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883